

Evening Dogri News Bulletin, 17 July 2024

इवनिंग डोगरी न्यूज़ बुलेटिन

समे-18:15 Hrs

Headlines

- 1 प्रधानमंत्री नरेंद्र मोदी होंरें कुल संसारी आर्थिक बाढ़े विकास लेई 'मेक इन इंडिया' सरबंधी कामयाबी कहानी दी तरीफ कीती ऐ।
- 2 केंद्री सेहत मंत्री जे.पी.नड्डा हारें दबाइयें-औषधियें ते मेडिकल उपकरणें सरबंधी मानकें बारै इक्क जायजा मीटिंग लाई ऐ।
- 3 केंद्री मंत्री डॉ. जतिंद्र सिंह होंरें फरीदाबाद च एशिया दे पैहले सेहत सरबंधी शोध आहली प्री क्लीनिकल नेटवर्क स्थूलत दा उद्घाटन कीता ऐ।
- 4 केंद्री मंत्री किरिन रिजिजू होंरें अमरनाथ जात्तरा लेई प्रबंधें दा जायजा लैने लेई बालटाल आधार केंप दा दौरा लाया।

<><><><><><>

PM-Make in India

प्रधानमंत्री नरेंद्र मोदी होंरें सोशल मीडिया पर इक्क पोस्ट च दस्सेया ऐ जे किस ढंग्गै कन्नै मेक इन इंडिया भारत दी अर्थ बवस्था गी वैश्विक मंच पर अगड़ा बदा करदा ऐ। सोशल मीडिया पर सांझी पोस्ट च मेक इन इंडिया दी झलक दस्सदे होई खलासा कीता गेआ ऐ जे दुनिया भर च भारती सैकलें दी मंग होआ रदी ऐ। बरतानिया, जर्मनी ते नीदरलैंड्स च निर्यात बदेया ऐ। पोस्ट मताबक बिहार च बने दे जुत्तें दा इस्तेमाल हुन रूसी सेना करा करदी ऐ। एह इक्क मील दा पत्थर ऐ जेड़ा अंतरराष्ट्री रक्षा बजारें च भारत दे बदा रदे असर ते क्षमताएं दे म्यार गी दस्सदा ऐ। अमेजान दी ब्लैक फ्राइडे ते साइबर मंडे बिक्री च भारती उत्पादें दा दबदबा बने दा ऐ। कामयाबी दी एह कहानी भारत च तैयार चीजें-बस्तें दी अंतरराष्ट्री मंग ते वैश्विक ई-कामर्स बजारें च भारत दी बदा रदी पैठ गी दस्सदी ऐ।

<><><><><><>

Nadda-Review Meeting

केंद्री सेहत मंत्री जगत प्रकाश नड्डा होंरें अज्ज नमीं दिल्ली च केंद्री औषधि मानक नियंत्रण संगठन सी.डी एससीओ दे अफसरें कन्नै इक्क समीक्षा बैठक लाई। बैठक दौश्रान सेहत मैहकमे दी सचिव अपूर्व चंद्रा ते होर दुए आला अफसर मौजूद हे। सी.डी एस.सी.ओ देसै च औषधि, चिकित्सा संदरें ते कास्मैटिक समेयान दे दे म्यार ते सुरक्षा गी कंट्रोल करदा ऐ। श्री नड्डा होंरें इस म्हीने दे रम्भ च राश्ट्री सेहत प्राधिकरण दे आला अफसरें कन्नै आयुष्मान भारत प्रधानमंत्री जन आरोग्य योजना ते आयुष्मान भारत डिजिटल मिशन दी बी समीक्षा कीती ही।

<><><><><><>

Prez. Speech Book

राश्ट्रपति द्रोपदी मुर्मू हंडे कार्जकाल दे पहले बरे दे 75 महत्वै आहले भाषणें गी संकलित करने आहली कताब 'विंग्स टू अवर होप्स' दे पैहले खंड गी कल नमीं दिल्ली च जारी कीता जाग। कृषि मंत्री शिवराज सिंह चौहान होर इस ई-बुक दा विमोचन करंगन। इस मौके सूचना ते प्रसारण मंत्री अश्विनी वैष्णव होर बी मौजूद होंगन। प्रकाशन सीगे आस्सेआ प्रकाशित एह कताब हिंदी ते अंग्रेजी दौनें भाषाएं च उपलब्ध होग।

<><><><><><>

Niti Ayog

सरकार नै नीति आयोग दी बनावट गी नमें सिरेआ तैय कीती ऐ। राई-बाई सरबंधी मंत्री शिवराज सिंह चौहान, रक्षा मंत्री राजनाथ सिंह, गृहमंत्री अमित शाह ते खजाना मंत्री निर्मला सीतारमण होंरेंगी ओहदे मुजब मेम्बर दे तौर पर शामिल कीता गेआ ऐ। सरकार दी इक्क अधिसूचना मुजब शिडक ट्रांसपोर्ट ते जरनैली शिडकें सरबंधी मंत्री नीतिन गडकरी, सेहत मंत्री जगत प्रकाश नड्डा, फौलादू सरबंधी मंत्री एच.डी कुमारास्वामी, एम.एस.एम.ई मंत्री जितिन राम मांझी, पंचैती राज मंत्री

राजीव रंजन सिंह सामाजिक न्याय के अधिकारिता मंत्री डॉ. विरेंद्र कुमार, सिविल हवाबाजी मंत्री के. राममोहन नायडू, जनजाति मामले सरबन्धी मंत्री जूल ओराम, महिला ते बाल विकास मंत्री अन्नपूर्णा देवी, खाने-पीने आहली चीजें गी डब्बा बंद करने सरबन्धी मंत्री चिराग पासवान ते प्लानिंग सरबन्धी मंत्री राव इंद्रजीत सिंह होरेंगी एहदे च विशेष साहा दित्ता गेआ ऐ। प्रधानमंत्री नरेंद्र मोदी होर नीति आयोग दे अध्यक्ष बने दे रौहंगन जदकि सुमन बेरी उपायधक्ष दे तौर पर जुम्मेबारी संभालदे रौहंगन। पूरे चिरे आहले मिम्बर न वी.के सारस्वत प्रो. रमेश चंद, डॉ. वी.के पाल ते आनंद वीरमनी।

<><><><><><>

Tribute-Martyrs

जम्मू-कश्मीर एक्स सर्विसमैन वेलफेयर एसोसिएशन कठुआ नै अपनै प्रधान कप्तान ज्ञान सिंह पठानिया हुंदी नुमायंदगी च डोडा दे शहीदें गी जिनें पाक प्रायोजित खूंखार आतंकवादियें कन्नै लडदे होई अपनी जिंदू दा बलिदान देई दित्ता हा, उनेंगी भावें भरोची श्रद्धांजलि दित्ती। अज्ज बडी बद्द गिनतरी च साबका फौजी कठुआ आहले संगठनें दे दफतरै च कट्टा होए ते शहीदें गी श्रद्धा दे फुल्ल भेंट कीते। स्हाडे जिला संवाददाता प्रदीप शर्मा हुंदे कन्नै गल्ल करदे होई अध्यक्ष कप्तान ज्ञान सिंह पठानिया ते उपाध्यक्ष कप्तान बलवीर सिंह होरें आखेआ।

<><><><><><>

SA Rajouri

राजौरी जिले दे ख्वास ब्लाक च सम्पूर्णता अभियान तैहत हुन केंद्र सरकार दियां सब्बै स्कीमां लागू कीतियां जा'रदियां न ते लोकें गी इंदा लाहू थोहना बी रम्भ होई गेदा ऐ। केंद्र सरकार दे जत्तें कन्नै स्कूलें दे कन्नोकन्नी अस्पतालें दी हालत च बी सधार कीता जा'रदा ऐ। स्हाडे जिला संवाददाता कन्नै गल्ल करदे होई जोनल मेडिकल आफिसर ख्वास डाक्टर अनुल शर्मा होरें आखेआ।

<><><><><><>

Jiterder Singh Health Clinic

विज्ञान ते टेक्नोलाजी राज्यमंत्री डॉ. जतिंद्र सिंह होरें कल फरीदाबाद च एशिया दी पैहली सेहत अनुसंधान सरबन्धी प्री क्लिनिकल नेटवर्क स्हूलत THSTI सेहत ते टेक्नोलाजी संस्थान दा उद्घाटन कीता। विज्ञान ते टेक्नोलाजी मंत्रालय मुजब एह सुविधा संसार भरै च नौमी ते एशिया च पैहली ऐसी सुविधा ऐ। डा. जतिंद्र सिंह होरें शोध संस्थानें, युनिवर्सिटयें ते गी सूक्ष्म जीवी संस्कृति प्रदान करने ते इक्क भंडार दे तौरा पर कम्म करने लेई संग्रह जी ह्यूमिक स्हूलत दा उद्घाटन कीता। डॉ. सिंह होरें मंत्रालय तैहत जैव प्रौद्योगिकी विभाग आस्सेआ टीका विकास ताई निजी क्षेत्र कन्नै इक्क दर्जन शा बद्द समझौता पत्रें पर बी दस्तखत कीते।

<><><><><><>

Rijju-Yatra

संसदीय कार्य ते अल्पसंख्यक मामलें दे मंत्री किरिन रिज्जू होरें अज्ज बालटाल आधार शिविर दा दौरा लाया ते इस बरे दी चला करदी श्री अमरनाथ जी दी जात्तरा पर औने आहले श्रद्धालुएं गी दित्ती जा'रदी स्हूलतें दा जायजा लैता। श्री रिज्जू अज्ज बडुलै बालटाल पुजे ते यात्रा दे छोटे रस्ते पर श्रद्धालुएं लेई सुरक्षा, सेहत ते होर दुइयें स्हूलतें सने प्रबंधें दा जायजा लैता। केंद्री मंत्री हुंदे सोशल मीडिया अकाउंट पर इक्क वीडियो च उनेंगी बालटाल पर छतरी पकड़े दे प्रबंधें दा जायजा लैदे होई दस्सेया गेदा ऐ। मौके पर मौजूद अफसरें मंत्री होरें गी सुचारू ढंगै सिर चलै रदी यात्रा ते यात्रुएं गी उपलब्ध करोआई जा'रदी स्हूलतें वारै जानकारी दित्ती। 52एं दिनें तगर चलने आहली इस बरै दी यात्रा 29 जून गी रम्भ होई ही। अजे तगर 3 लक्ख 30 ज्हार शा बद्द यात्रु शिवें दे हिमलिंगम रूप च दर्शन करी चुके दे न।

<><><><><><>

Packaging-Honey

कृषि निदेशक जम्मू अरविंद्र सिंह रीन होरें कल कृषि निदेशालय कृषि भवन तालाब तिल्लो जम्मू च मैहकमे दे फार्मे, मधुकक्ख घरें च तैयार शहद दी नमीं पैकेजिंग दा उद्घाटन कीता। एहदे च म्यार बनाए रखने ते गाहकें दियें मंगें गी वाजिब भाएं च उपलब्ध होने दी समर्थ ऐ। इस मौके बोले होठ अरविंद्र सिंह होरें आखेआ जे नमीं पैकेजिंग ते तरमीमी कीमतां मधुमक्खी पालन

उद्योग दा सर्मिन करने ते गाहकें गी म्यारी चीज उपलब्ध करोआने दी मैहकमे दी बचनबद्धता गी दस्सदी ऐ। उनें दस्सेया जे इसी गाहकें आस्तै अद्दा किलो दी पैकिंग च बी उपलब्ध करोआया गोआ ऐ।

<><><><><><>

Ek Ped Maa ke Naam

जंगलें दी राखी हिफाजत ते चपासम गी बचाने बक्खी जागरूकता फलाने दे मकसदस कन्नै गवर्ननमेंट डिग्री कालेज मद्र दी एनएसएस इकाई आस्सेआ प्रिंसीपल डॉक्टर राकेश कुमार कौल हुंदे मार्गदर्शन च एक पेड़ मां के नाम अभियान रम्भ कीता गोआ। इस मौके पर प्रिंसीपल होरें आखेआ जे रूक्ख-बूहटे स्हाड़ी जिंदु दे रखवाले न ते मौजूदा जीवनशैली नै चपसदम गी मता नुकसान पजाया ऐ ते जेकर समें रौहंदे इस बक्खी ध्यान नेई दित्ता गोआ ते समूलची मानव जाति गी खतरे दा सामना करना पेई सकदा ऐ। उनें दस्सेया जे बेमौसमी बरखा ते दिन-व-दिन बदा दा तापमान कुदरती शारे न जे असेंगी सौहगे होने दी लोड़ ऐ। इस करियै रूक्ख बूहटे लाने समें दी मंग ऐ।

<><><><><><>

Weather Forecast Jammu

पश्चिमी हवाएं च इक्क नमीं कमजोर गड़बड़ी चिरे रातीं थमां जम्मू-कश्मीर गी प्रभावित करन जा करदा ऐ। एहदे कन्नै कल किश लाहकें च टकोहदा करियै जम्मू संभाग च गर्जो-गर्जी कन्नै बूदाबांदी होने दी मेद ऐ। जम्मू खित्ते च कल दिनें दे तापमान च किश डिग्री दी गिरावट आने दे सार न। उआं व्यापक बरखा दी संभावना 25-30 प्रतिशत गै दस्सी गई ऐ।

<><><><><><>

IMD-Forecast

मौसम विभाग नै कर्नाटक दे दक्खनी हिस्से, सौराष्ट्र ते कच्छ क्षेत्र कोंकण, गोवा तटीय कर्नाटक च बक्ख-बक्ख थाहरें पर कल्लै तगर मौलेधार बरखा बरने दी पेशगोई कीती ऐ। मैहकमें मुजब अगले 4 शा 5 दिनें दौरान मध्य भारत ते प्रायद्वीपें च मानसून दे सक्रिय होने दी संभावना ऐ। ओडिशा च बक्ख-बक्ख थाहरें पर 19 ते 20 जुलाई गी बड़ी मती बरखा होग। पंजाब ते राजस्थान दे पच्छमी हिस्सें च कल्लै तगर मौलेधार बरखा होग जिल्ले के चंडीगढ़-हरियाणा च 18 ते 21 जुलाई ते उत्तर प्रदेश च 20 ते 21 जुलाई गी बड़ी मती बरखा बरने दी पेशगोई कीती गई ऐ।

<><><><><><>

Jai-Shankar Mauritius

विदेश मंत्री डॉक्टर एस. जयशंकर होरें अज्ज मॉरीशस दे साबका प्रधानमंत्रियें नवीन रामगुलाम ते पॉल बेरेंजर हुंदे कन्नै मलाटी लाई। डॉक्टर राम गुलाम हुंदे कन्नै लग्गी दी मलाटी दौरान डॉक्टर जयशंकर होरें दपक्खी पक्की सांझेदारी बदाने आस्तै बचनबद्धता जाहिर कीती। श्री पॉल बेरेंजर हुंदी बैठक बारै विदेश मंत्री होरें दस्सेया जे उनें मौजूदा मुद्दें पर सार्थक गल्ल कत्थ कीती।

<><><><><><>